



Sesida dals

7 d'avrigl 2020

Communitgà ils

9 d'avrigl 2020

Protocol nr.

271

Dumonda Rutishauser

concernent la participaziun dal chantun Grischun al project da la Confederaziun:
«Sustegn finanziel per programs da promoziun chantunals per persunas che
returnan en ina professiun da la tgira da lunga durada»

Resposta da la Regenza

Cun sia brev dal 1. da mars 2018 ha il Secretariat da stadi per furmaziun, retschertga ed innovaziun (SEFRI) orientà il Departament da giustia, segirezza e sanadad (DGSS) davart las pussaivladads da cofinanziar curs che survegnan in sustegn chantunal per persunas che returnan en ina professiun da la tgira da lunga durada fin l'onn 2022. Cun las contribuziuns federalas duai vegnir pussibilità a las persunas che returnan en il mund da lavur da pudair frequentar in curs adattà per cundiziuns pli favuraivlas. Las contribuziuns vegnan pajadas mo als chantuns, q.v.d. las contribuziuns na vegnan betg assegnadas directamain ad instituziuns da furmaziun u a participantas e participants da curs (uschenumnada finanziaziun dal subject).

Il Center da furmaziun per la sanadad ed ils fatgs socials (CSS) a Cuira organise-scha dapi onns purschidas da furmaziun supplementara specificas per persunas che returnan en ina professiun da tgira. Quests curs èn dentant savens stads dumandads uschè pauc, ch'els n'han betg pudì vegnir realisads, perquai ch'il dumber da participantas e participants era memia pitschen. In motiv per il pitschen interess è stà quel che la scolaziun n'ha betg adina pudì avoir lieu exactamain il mument che las participantas ed ils participants èn returnads en il mund da lavur. In punct engrevgiant è er stà quel che differentas absolventas e differents absolvents n'han betg chattà in engaschament correspondent suenter il curs, quai che ha chaschunà dischillusiuns e frustraziuns.

Ultra dal CSS han er singulas instituziuns dal sector da sanadad e da tgira concepì agens concepts d'introducziun per persunas che returnan en il mund da lavur.

Quests concepts vegnan cumbinads e realisads en il manaschi cun las emprimas experientschas da lavur. En il chantun Grischun datti pia gia differentas purschidas per persunas che returnan en ina professiun da tgira en general sco er en ina professiun da la tgira da lunga durada en spezial.

Tar la dumonda 1: Actualmain vegn elavurà a la Scola auta spezialisada bernaia in studi che duai mussar, sche ed en tge dimensiun ch'ils returns en il mund da lavur dependan da la frequentaziun da curs per persunas che returnan en il mund da lavur u sche plitgusch ina piazza libra disponibla e las intenziuns da l'instituziun respectiva dal sector da sanadad èn decisivas per persunas che returnan en il mund da lavur. Cur ch'il rapport stat a disposiziun, è la Regenza pronta d'examinar in'eventuala participaziun dal chantun Grischun al project da la Confederaziun per persunas che returnan en ina professiun da la tgira da lunga durada. Il CSS è vinavant pront d'organisar la purschida modulara vertenta ch'è adattada er per persunas che returnan en ina professiun da la tgira da lunga durada. Per motivs economics vegn dentant premiss in dumber minimal da participantas e participants per realisar ils curs, per ch'ils curs respectivamain ils moduls possian vegnir purschids uschia, ch'ils custs vegnan cuvrids. Sche las instituziuns da la tgira da lunga durada pon organisar ina gruppa dad otg fin diesch participantas e participants, po il CSS er porscher in curs sin mesira per questa gruppa. La Regenza prevesa perquai da cumplettar l'incarica da prestaziun 2021 fin 2024 dal CSS e da sustegnair tals curs sa basond sin l'art. 7 da la Lescha davart lieus da scolaziun en ils fatgs da la sanadad e socials (LLSS; DG 432.000), independentamain da la cofinanziaziun da la Confederaziun a partir da l'onn 2022.

Tar la dumonda 2: Per pudair satisfar al basegn da persunal da tgira scolà po il project federal furnir ina contribuziun. Las cifras actualas da la Confederaziun sco er dals chantuns mussan dentant, ch'il program n'ha fin ussa (anc) betg pudì cuntanscher sias finamiras.

Tar la dumonda 3: Ultra da las purschidas dal CSS è il focus drizzà fermamain sin ils acturs dal sector da sanadad. Tenor la Regenza èsi perquai raschunaivel che las instituziuns dal sector da sanadad realiseschian er en l'avegnir concepts d'introducziun adattads per lur instituziun per persunas che returnan en il mund da lavur. Las instituziuns pon constatar il basegn da scolaziun specific a maun dal portfolio d'ina persuna che returna en il mund da lavur e determinar ils moduls da scolaziun necessaris.



En num da la Regenza

Il president:

Dr. Chr. Rathgeb

Il chancelier:

Daniel Spadin